

百名家詩選

小引

魏子曰余寓虎丘五閱月山川秀麗烟嵐日環  
几席晨牕煮字不啻置身園苑中迨渡震澤溯  
淮泗偶一頰首其歸然天表青連齊魯者則泰  
岱也躋其巔南望吳門僅若匹練至虎丘勝槩  
則亦一拳石可以納之袖中一勺水可以貯之  
孟內不覺神爲之肅魄爲之震天下之大觀其  
在此乎及過曲阜登孔子之堂觀車服祭器古  
質嚴重則又徘徊久之流連不忍去聖人之澤

歷百代而日新其靈秀之氣蔚爲令嗣豈顧問  
哉英賢接踵在當時已然至漢有北海宋有道  
輔尤以光偉大節爲古今艷誦本朝

世祖時事開典禮心一孔公復能抗疏伏諫直聲  
動海內今踰三十年紹先先生裊然高舉矣掇  
巍科登翰苑高文典冊方以筆楮相世

聖天子以爲孔氏之門每多忠貞之佐蘭臺書  
帙不足煩之宜處于梧垣栢署之間用觀其折  
檻伏蒲之氣從此而上光

祖烈下澤蒼生乃指顧間事天下將益景朝陽  
之鳳矣歲壬子先生過五鹿省候觀察余方寓  
天雄書院論次風雅而門外青苔踏破尺許高  
軒隱隱從竹影中出名則霄升心則谷下玉山  
映座令人氣靜繼授余古今各體高揖三唐而  
俯視七子一快讀之并州剪遞其利袁家梨讓  
其爽技至此乎余思三百篇自屬君家刪定豈  
當年過庭之時果有異聞耶余將又懷陳亢之  
疑矣

百名家詩選

福清魏憲惟度輯選

華亭沈荃釋堂南城吳學炯星若

新城王士禛西樵嘉善孫鏡雯靜涵

泰

孔興鈞

字紹先曲阜至聖裔

王子喬

擬古

太子晉遠乘白鹿遊雲中遠乘白鹿遊雲中顏  
如童太子晉神鹿似雪丹唇紅空中戲行若龍  
出自海上蓬萊紫霞宮歷嵩高騎氣馭風上過

萬丈間闔舉手長揖天公上古皇王不足令令  
我英主致休禎四海殷殷泰道呈元氣氤氲永  
康寧靈娥羅列鼓琴瑟神通八極和且平鳳凰  
翔棲殿上長奏聖人前延我皇帝億萬年

隴西行

仙境奚所有芝草種瑤田猛獸守重關磨牙何  
獐然鳳凰振華猗兩兩舞跕躑玉女迎遠客綽  
約步嬛嬛含笑傲玉齒揮袖生紫煙揖客寶堂  
上鋪設列瓊筵飽以胡麻羹飲以瓊漿泉載歌

拊瑤瑟玉指動朱絃一鼓兩三行清韻入寥天  
客拜殷勤起遙送洞扉前相贈一丸藥意戀多  
綿綿仙家殊塵境無令俗慮牽榮華徒自惜憂  
樂苦相煎

元日雨

不覺逢元日悠然動旅思僧開迎竹戶客放讀  
書帷鳥窠知春早花醒愛雨滋盤中擎細菜延  
佇許多時

訪友

江干直放棹信宿赴君期  
雨歇花魂淨晴新蝶  
夢知東西難卜  
灤大小愧稱兒  
且盡須臾酒城  
闌恐有司

早朝

旭日曈曈啟自天  
百條雲萃御樓前  
青松綴玉  
傳甘露紫笋浮花  
瀾醴泉多士聽宣  
魚貫入諸  
班分直雁行聯  
書生謬忝儒紳後  
執策從容侍  
講筵

秋感



昨夜西風過郡城  
遺童出戶問秋聲  
霖音浙瀝來恒嶽  
雲影蒼茫隱

帝京宦業未能逢  
夢卜家山何處問  
春耕讀書曾嘆馮  
唐老匣劍帷燈空  
復情

寓園

無邊風景耐人觀  
競秀爭妍不厭繁  
一曲漁歌煙漠漠  
三春農夢雨漫漫  
雲霞谷裡禽聲煖  
靄靄圖中月色寒  
何處冰壺來濯魄  
花陰石上好盤桓

贈友移居

草草河千復定居幽人性與市城疎庭中新貯  
雲霞色堦下重滋雨露蔬愛客特開三徑竹課  
兒閒檢一床書許多勝事頻堪記竟日修琴更  
對余

龍潭

龍去名還在潭空水不流荒臺寒竹影古寺暗  
松楸客喜雲堪伴神因鳥解愁何人時載酒隔  
嶺聽樵謳

寄家觀察心一

暫得岑閒正可娛清尊獨對一峰孤幽懷但願  
揖奇石散秩何能請鑑湖宦業漫飛池上鷁春  
光早到樹頭鵠故山無盡煙光路大阮何年共  
一區

寓村寺

荒村餘古寺暫住伴莓苔不見幽人過空邀野  
客來堂中鐘磬冷竹裏鶴猿哀午夜初生月晶  
瑩絕點埃

留別吳星若

西窓風雨幾同聽，惆悵離羣野渡橫。  
酒肆帘飛雲一棹，禪林鐘度月三更。  
柳花飛處誰傳夢，鴻鴈行中好寄情。  
此去西山秋氣爽，匣中長劍欲教鳴。

寄懷魏惟度

寶劍南來歷歷星，長餘紫氣接天青。  
名高萬里爭投轄，才霸千秋似建瓴。  
鶴步松林看獨遠，鶯鳴柳浪憶同聽。  
涇河清映盧溝月，早起東風薦

藻馨

宿趙州寺

散秩全無事  
山門寄興豪  
誰憐花雨瘦  
自笑劍書勞  
午夜鐘催夢  
清晨梵入禱  
趙州茶正熟  
對坐讀離騷

郊行喜家觀察心一禱雨有應

千里平疇景物隆  
青青麥色四郊同  
誰家婦子勤東作  
幾處豚蹄祝歲豐  
草屨半沾寒食雨  
春衫不畏柳花風  
共傳觀察勤民事  
獨索焚香對

彼穹

梅花

歷盡冰霜節不更喜生深徑促春聲微微玉影  
三分白淡淡冰姿幾點清弱質臨風神欲舞幽  
香弄幌夢難成東風應識愁人意素友相依解  
恨情

草堂

春風吹綻一林花澗水潺湲可泛槎野寺鐘鳴  
浮碧草堂客到舉朝霞隋蘭獨賞誰爲佩海

鳥無憂自宿沙却歎叔平多世界木奴千樹日  
營家

客懷愁緒向春開倦鳥翺翔又一回峭巘千尋  
懸素瀑平溪九曲送流杯纖簾想見多幽思執  
戟空憐老賦才芳樹欲含無盡意爭如風雨不  
停催

讀枕江堂詩贈魏惟度

先生詩新奇殷鏗何足比拂几再四讀輾然爲  
之喜秋來何處山翠嵐近席几文章聲氣通寧

論幾千里可知千古入隨地動仰止登臨興有  
餘蒼烟滿墨紙魏傳重惠余爲續行山史

謁比干墓次大叅李素園韻

何代無興廢乾坤此廟存鴛鴦垂瓦影蝌蚪繡  
碑痕肅肅冠裳地彬彬典禮門俯躬堂庑下彷彿見精魂

油油禾黍地碧草更萋萋雲影如畱佩松風尚  
聽聲正容凝浴月光氣欲侵霓何必傷心極頻  
來烏雀啼



數諫驚天地千秋重死生  
夔龍尊正色狐兔惕寒聲  
故土何曾葬新封益見清  
崢嶸尼父筆一字別周京

臣罪當誅矣難言嗣主驕  
剖心安一日旌骨已千朝  
護守多松柏芟除別艾蕭  
棲遲歷下客懷古未能消

殷三仁故里

洪城內廟尚存

心出形能踐器歸疇不二  
到今存故里在昔妥先王

同盟山

武王會諸侯伐紂處

軍中敢遽動山下尚遲盟此際勞師詔何妨下  
各營

伯夷叔齊扣馬處

獲嘉境內

日無左右兵手格同召馬大義肯姑容雷同牧  
之野

蘇門山

我欲家蘇門寄興在靜功補山之缺陷種萬株  
怪松

宿阿曲

白雲容渺渺紫氣自騰騰  
神來戲草筵鐘鼓長  
依憑

道君曲

月明中夜星耀將曙  
道君陽降鸞鶴爲馭

聖郎曲

霞車來冉冉星佩響鏘鏘  
蹈廊歡華燭靈對樂  
椒漿精爽自來及瑞靄氣何昌

天雄普照寺

門外方池湧綠波  
天空日影淡烟蘿  
昇平願製  
凌雲賦  
草野爭傳復旦歌  
古寺僧眠鐘自語  
花臺客醉月恒過  
興來欲覓前川路  
魏博城南問素娥

金灘遣興

青疇紫陌遍生花  
乘興金灘泛水槎  
漢栢有烟  
背帶南山桃無萼  
不飛霞  
閒行鹿過開幽徑  
醉臥鷺來分煖沙  
但得賞心名樂國  
林巒何處不爲家

小引

魏子曰余客涇淵夏日初長僦蕭寺半畝錯昏  
曉沉睡每念世情嶮巇涼涼噩噩有江河日趨  
之勢且乾坤甚小出門無餘地生風飄凌雲  
不至束縛以歸山岡亦有生快事遂登顓頊故  
城訪蒙莊垂釣處不禁望古遙集徒深寤歎忽  
魏博備兵使者孔公以定舫申先生詩郵示急  
令老蒼頭固扃兩白板捧讀之見其性情脆孌  
詞氣踈越體裁規制古人法律典型近代石鼓

金臺等篇見稽核之功陌上結客諸什備美刺之旨他如歷代宮詞寄托全在言外秋日集杜組織別出心裁使五千里外旅人于午日當窓時作清風江上澹月簾前之想又何必訪太古遺墟慕混沌日月作蒙上人逍遙齊物觀也然吾讀孔公八行云先生官詞林卓犖群書以備天子顧問近始假歸與乃兄鳧盟倡予和汝極天倫之樂行見其修之家者藉諸國所進正未可量耳區區數詩予烏足以盡知之聊藉此以

復孔公母爲石倉缺典而已

百名家詩選

福清魏憲惟度輯選

濱州杜漢子濂侯官倪康年箕三

曲阜孔胤樾心一錢塘趙端又呂叅

申涵盼字隨叔號定舫廣平人

陌上桑

二月春蠶饑樹桑吐新葉有女名羅敷携筐適  
南陌芳年二八餘濯素如秋月光澤動行人使  
君下車歇無端前致款婉意以相迫不識女素



心謂是凡巾幘醜顏誇門第欲貯黃金宅女乃  
再拜言使君誠貴官桃李自逐熱松栢自耐寒  
妾有荆作釵不願青琅玕妾有布爲裙不願紫  
羅紕孔雀好羽儀亂匹同野鴛鴻雁唳高秋比  
侶翔雲路微物且有偶人可易其素君婦不如  
新妾夫不如故

結客少年場行

多結客少聚金金盡有來時客散無知音知音  
何悠悠長安西陌頭貂冠寶帶錦雲裘玉勒金

羈跨紫驪意中不知誰爲仇往來馳驟看吳鉤  
撼泰山搏猛虎瞋目不言聲帶怒家無擔石儲  
耻與王侯伍白晝殺人心不平尸牋狼籍道縱  
橫腰間寶劍常帶血官吏莫敢問姓名君不見  
郭解徙咸陽人人爲盡死借問萬戶侯何如一  
俠士

野田黃雀行

孔雀死於尾鸚鵡死於舌雀無羽毛奇弋者宜  
不屑陌頭挾彈兒彈其雙翼折食我田中苗自

遺口腹孽黃雀黃雀計何拙田中苗盡農夫血  
力不能搏兔如犇上鷹貪彼稻粱非明哲

雜興

青青嶺上栢移植廊廟間但能守清操所至皆  
深山疏水聊足樂逢迎耻厚顏閉門而却掃坐  
臥有餘閒何爲長戚戚徒使鬚毛斑

公卿稅文藻名上貢航梯遶東誇白豕楚人來  
山鷄欲貴洛陽紙先災大谷梨獵者道交錯警  
唾比虹霓誰作指南車破此岐路迷士人先德

行淘金黥沙泥

米採浦中珠薪砍月中桂珠桂尚可求米薪日  
難繼緬懷赤松子辟穀良拙計業已入深山烟  
霞不須貫何不行此術用當封侯際

鴉鳴咸聵目鵲噪競開顏微物何休咎愛憎分  
其間况於俠邪輩最善爲躋攀臨井而下石始  
怡人情艱君子別涇渭交道非等閒

鴛駘策田間驂驪走千里人有能不能安得強  
事此羊裘隱得名銅柱功成毀富貴無終窮所

難在知止古來曠達人急流退者幾

貂珥羨泉石韋布羨華簪相羨無已時何者稱  
其心嶺雲高百丈潭水深千尋水雲相上下映  
帶成古今履位而行素賢聖無升沉

陶風圖 館課

文武周之聖天子開國承家農事始帝王何必  
重黃金黃金積多民餓死寶藏璽盈富貴絕一  
絲一粒蒼生血作法于涼猶懼奢後車偏蹈前  
車轍東南地沃西方鹵聖人任德不任土建康

荆棘泣銅駝岐陽俎豆猶鍾鼓卜年八百無奇  
謨不信但看函風圖丹青畱得艱難在紙上曾  
聞歌舞無

拜杖行

贈邵弘齋先生

嘉靖龍飛飛漢水初年治井開元美典獻無端  
比漢王廷臣半爲爭禮死張桂逢迎釋主憂一  
言取相田千秋朝離郎署暮臺閣井將氣節易  
封侯武林計部目眦裂伏闕上書聲泣血觸怒  
逆鱗請尚方朱雲攀檻檻爲折殿頭拜杖血肉

飛陰有鬼物相護持日月黯澹風雲黑杖公不  
死公不知三木囊頭頭搶地不屈主尊屈獄吏  
吏曰不敬法當誅狀已奏可公不憚九重忽報  
乾清災至尊中夜心徘徊回天賴得中涓力輪  
臺詔下圜圉開布颿南去欣無恙子方減死流  
烟瘴春日吟詩君子亭秋風閒倚登高杖杜門  
三十八年餘石室空留萬卷書馬胤風高啼杜  
宇白雲對滿水雲居秉釣赫奕今何有有意死  
公公不朽祠前松栢蒿年青至今膾炙詩人口

夜宿劉將軍園亭

建纛江東久將軍喜論文門庭無榮戟池榭有  
烟雲曲折堪修禊風流已冠軍我來方夏日涼  
月夜繽紛

仗劍從戎去堂畱綠埜虛闕丁晨掃徑奴子夜  
烹魚灞上誰開壘西湖正跨驢清時無戰伐衛  
霍有閒居

封事

封事連朝至驚傳水旱書朝廷憂未已郡國政



何如兩稅追呼盡常平議論疎捐租雖有詔內帑已無餘

吳長庚安南使還

勅命趨南越宣威震百蠻君王勤遠畧臣子歷  
諸艱風急飛鳶渡雲迷勾漏山間關驚易老霜  
雪使臣顏

送米紫來司李贛州

疎散遊京雒冠裳束米顛蒲風催去旆梅雨漲  
行船江右荒殘久刑曹長厚先莫耽山水癖雅

望卜初年

雨

遠壑雲生岫扶筇渡晚溪青搖榆莢雨紅濕杏  
花泥語燕參差舞藏鶯斷續啼老農占歲稔荷  
笠舉春犁

張素存年兄以何處秋生早八首見示卽  
走筆奉和

何處秋生早秋生搗練中影憐孤夜月聲送隔  
鄰風遠信無鴻寄相思有夢同漏殘催剪尺牒

冷燭搖紅

何處秋生早秋生夜月中井梧含宿露戍鼓雜  
悲風人語三更靜清光萬里同樹搖亭影落小  
閣隱燈紅

荷蘭貢寶輿

昭代聲靈遠梯航入帝京聖人不愛寶海國自  
抒誠翠蓋團金箔珠簾綴紫纓何如身勸駕蒲  
轂御階行

秋日卽事集少陵題并步元韻八首

擣衣

關山牽遠夢空夜落清砧一片淒涼月三更離  
別心閒情因病減歸思入秋深珍重高樓笛休  
吹塞上音

促織

芳塘傳細響宛轉喚征人天寶籠中貴長門枕  
畔親草根吟月夕墻底泣花晨漫道同簫管愁  
懷聽更真

蒹葭

野岸霜風渡蒹葭  
柰汝何蒼煙迎返照  
紫籜點輕波  
客夢家山遠  
懷人秋水多  
釣磯江上冷  
歸計竟蹉跎

螢火

草螢秋徑落  
隨意故飛飛  
露濕明珠佩  
風吹火浣衣  
雨中光不滅  
月下影還微  
自應隋宮詔  
年年照客歸

天河

天空雲影散  
萬里絳河明  
岸直波濤白  
窓虛緯

度清涼風吹夜析霜月下秋城聞有支機石尋  
源感慨生

歸雁

幾日湘江去重來碣石雲冥飛常避弋棲澤自  
爲羣結陣踰高柳啣蘆背夕鴈征鴻無倦羽歲  
歲客中聞

夜雨

高閣梧桐夜瀟瀟氣已秋纔添豆葉雨欲製木  
蘭舟燒燭看長劍攤書當勝遊西山多霽色

日一登樓

白露

掌露娟娟淨縑塵散馬蹄月明青瑣闥夢斷武  
陵溪渡雁驚寒早啼鳥繞樹棲秋風催不去冷  
落故山蹊

送程立庵學士冊封安南

虎節龍旌賜上方乘槎萬里策輕裝 朝廷詔  
令通交趾學士文章重夜郎絕域但能沾雨露  
人臣何必不風霜尉陀奉朔歸圖版麟閣勲名

在玉堂

病中得家書

太行遙望白雲深  
鴻雁南來寄好音  
春日弟兄應自健  
天涯遊子獨關心  
客途夢繞常千里  
病裡書真抵萬金  
三徑未荒松菊在  
此生何事負園林

實錄館開 賜宴禮部恭紀

提封萬國靜烽烟  
宵旰垂衣十八年  
風雨創成基業在  
艱難畱得史臣傳  
較書虎觀推劉向  
講



業龍門憶馬遷光祿宴開恩寵渥沙堤歸晚撤  
金蓮

艾司農長人節師代祭嵩嶽還朝

星輅仗節度秋雲歸路春旌帶晚照銅雀水流  
銜岸草臥龍風冷落鴉羣禊袍初濕三花雨蠟  
屐猶沾二室雲河內千家憐內史朝天應上採  
風文

韓愈子庶常外補廣平教授書贈

承明數載曳華裾三輔行沾化雨餘紫禁芝泥

蘇軾草青龜柿葉鄭虔書傳經戶滿邗山雪垂  
釣厨烹大陸魚高臥不殊西掖穩蒲簾春日照  
寒廬

送王幼興年兄之任梓潼

五月驅車棧道長巴西萬里去爲郎漢朝宰輔  
多山令晉室簪纓半屬王風落琴聲吹劍閣雲  
移晷影渡瞿塘山城無事看山好漉酒郛筒月  
滿林

迢遞征帆背夕鴉江流曲折入三巴錦官城下

初裁錦花蕊樓前遍種花君臥林泉垂十載邑  
遭兵燹失千家于今循吏惟休息日日吟詩早  
放衙

宣王石鼓

在國子監

橋門石鼓臥嶙峋雨溜霜吹漸失真傳是宣王  
勤武畧却從尼父視明禋鼎彝並列追風雅兵  
火無虞歷漢秦一自東都朝貢絕幾隨鍾虡屬  
真人

黃金臺

在昌平

昭王擁篲已塵埃  
碣石宮前盡草萊  
伏櫪有心防虎視  
按圖何地索龍媒  
空聞易水千金價  
早見咸陽萬騎來  
滿目霜笳悲馬角  
黃雲落日照荒臺

張華宅

在蘆溝河北

茂先博物得封侯  
畫策平吳管樂儔  
石鼓銅魚沉黍谷  
龍泉寶劍落蘆溝  
海鳧已兆華亭淚  
荆棘空慚索靖憂  
故宅荒涼霜月滿  
蟪蛄聲咽野雲愁

樓桑村

在涿鹿

樓桑葉落塞風飄古碣雲封夜寂寥一統未成  
龍鳳死三分既定虎狼驕蚩尤戰壘埋沙磧昭  
烈祠堂臥野樵劍閣錦江天下險中山王氣接  
神堯

賈島峪

在房山

峪中石屋隱蝸廬想像風流百戰餘才與孟郊  
相上下名從韓愈得吹噓逃禪早悟浮屠法玩  
世曾騎京兆驢多少園陵俱泯滅至今野老說

山居

酈亭

在樓桑村南

道元別業已飄零大樹村南尚  
有亭鹿澤鳴笳雲漠漠琴溪飲  
馬石泠泠隨刊八載歸神禹羽  
翼千秋注水經寂寞漁陽兵燹  
後草間畱得讀書螢

黃竹子歌

江邊黃竹子風雨夜悲鳴不堪  
截作笛亦有斷腸聲

西宮怨

玉闌斜倚憶吹簫  
秋殿寒雲暗鵲橋  
銀箭數催欹枕聽  
昭陽夜雨滴芭蕉

吳宮

琴臺春老月黃昏  
芳草霏微靜掩門  
愁聽館娃催夜宴  
此身恨不葦蘿村

楚宮

章華明月照迴廊  
滴銅壺夜漏長  
近欽湘裙腰已細  
君王別夢訪高唐

秦宮

防房壯麗接南山日聽鳴箏髻已斑十萬旌旗  
容得下掖庭偏不破愁顏

漢宮

珠簾寶案映窓紗辜負長門二月花買賦漫誇  
顏色好漢庭霜冷怨琵琶

魏宮

綺闌玉井接蟾蜍水殿風涼月滿渠不是翠華  
遲望幸後宮宵旰六尚書



晉宮

絳紗未繫繡衾孤目斷羊車獨擁爐吳妓三千  
充近掖不如半斛石家珠

齊宮

麝殿銀泥闔服鮮雉頭鶴氅稅民錢畫眉買黛  
無人問匝地鋪金步步蓮

陳宮

臨春燕語聽呢喃紅濕鮫綃淚滿衫玉樹後庭  
誰得寵女中學士掛空銜

隋宮

汎舟踏月夜遊多  
未審乘輿何處過  
十六院中  
燈火暗  
遙聞馬上奏清歌

唐宮

沉香亭畔月光斜  
羯鼓初回照夜車  
聞道海棠  
春睡足  
上陽無復種梅花

小引

魏子曰近代詩家互相雄長譬逐鹿矣然獲鹿者多指爲馬至馬腫背者亦思伏櫪長鳴此風之所以傷也邵學憲雪嵐有五鹿詩選余得快讀之至袁公杜少語孔觀察心一曰獲一鹿矣不敢指爲馬矣馬腫背者且降伏道旁矣觀察笑曰獨不可爲龍乎余曰先生好龍者也龍潛于淵升于天邀翔于雲表一出而雨天下誰不好之者然葉公好之而不知所以好故真龍伏

而畫龍得以縱橫于其懷今杜少以清白吏子  
孫日振家聲有龍種矣至性孝友以肝膈交天  
下士有龍德矣著述甚富文名蠱起于燕趙間  
有龍文矣且雋才敏妙雪嵐稱其于絲竹繁會  
中授簡揮毫灑灑數千言則龍性之變化又不  
可知矣先生好龍者也吾願先生之好真龍毋  
好畫龍也觀察曰誠如子言請出以問龍師決  
非鹿也非馬也非馬腫背也

百名家詩選

福清魏 憲惟度輯選

曲阜孔胤樾心一 侯官陳 恭聖璽

遵化周體觀伯衡 福清林 劭子將 叅

袁 佑 字杜少東明人

天馬歌

天馬貴直千黃金鳳頸龍文汗溝深剪鬣韉出  
無人顧垂首至膝塵埃侵夕出咸陽門夜涉太  
行坂驪車盤盤泥沒輪四蹄躑躅羊腸遠嘶天

風振林木電光霍霍閃魚目飲流山下羨白犢  
嚼勒嚙澗草沙寒草不肥崑崙上有禾寧長五  
尋大五圍望金臺憶赤水風霜漸恐加長齒何  
時解衣遇孫陽一夕爲君馳千里

秋懷

水國蒹葭處處秋官鐘戍角滿城樓寒雲帶雁  
移孤樹急雨啼猿下晚洲紅女機邊空有淚仙  
翁河上不知愁飄搖白動虛林色緘月低懸漢  
影浮

大名遇邵凌玉學憲馬上

款段南來馬不期  
竟是君悲歌同客路  
聚散逐秋雲四海無  
新侶十年有舊文  
河流兼樹響愁病  
那堪聞

濟南雜興

人近孤城望古陴  
往來徒自誤春期  
天晴花放桃源驛  
月冷蝶驚漆水湄  
客倦揮毫題白鳳  
兵驕挾矢射蒼隄  
山川霸氣仍如舊  
夾谷平原障作籬

山勢平臨近水亭白鷗白鷺滿沙汀柳條待雨  
仍含凍麥意違春未放青冀北九方能識馬濟  
南一老自傳經夜來風起連城響伏枕關心不  
可聽

月夜遊秋水橋岸

藕花短短葦花齊漁艇秋烟草閣西出寺溪雲  
隨意遠過橋山月趁人低藏書對客常丸藥載  
酒尋僧獨杖藜砧杵不開千戶靜蕭蕭城闕夜  
烏啼



少年行

關入燕姬肆金鼎傾醍醐半醉飛馬去殺人帝  
城間爲報他人讐帶血趨天衢激昂色不變下  
馬問博徒

五侯張綺筵四座無寒士騎馬直登堂相見不  
爲理飛揚據上席側首皆尊齒吳歛發清音柔  
曼難入耳將袖彈秦箏颯颯北風起

鳴雁篇

鳴雁飛鳴何翩翩縱橫自矜毛體全刷羽弄紫

海竦翮蟲青天嚙嚙和聲散雲烟銀漢無津梁  
瞪目遠瞻空盤旋啣蘆雁門往復歸羞同周周  
相因依炎洲施網羅翡翠何如歛翅且早飛滄  
洲之水可忘饑

北郊

白日霜郊閒晚霽出門取路問漁罾城陰瘦馬  
嘶殘雪岸口飢鳥立斷水負水人家千隴麥隔  
溪烟火一林僧著書應恠經時瘵多病只今似  
茂陵

九日約登東臺寺未果

古寺嵯峨出重陽欲一尋荒原禾歷亂寒圃菊  
蕭森避世塵猶擾養生病尚侵飛雲迷洞口落  
日晃城陰瓠子方沉玉祗園未布金空將陶令  
酒誰識遠公心野色雙臺合秋光獨樹深  
雁王低傍戶鼠婦細穿林荷芰應堪製茱萸自可簪  
賦成悲楚客惆悵罷登臨

長門怨

日日教成祇自悲翠鈿金縷亦何爲君王縱愛

傾城色不出長門那得知

沉沉宮漏夜無聲半捲珠簾見月明譜出霓裳  
供奉曲避人花下自吹笙

凌玉去燕遊晉歸贈以詩賦此奉酬

殘菊重陽一醉迴虞卿飄泊正堪哀入春詩夢  
池中草落日書傳隴上梅綠野依然遊子去青  
山無恙故人來五雲北望天高處知是黃金郭

隱臺

飲幼興齋中賦和

獨鶴盤雲下九臯西風杖屨肯辭勞陶潛自種  
當門柳仲蔚無妨滿徑蒿日薄長林留晚照夜  
深急雨落秋濤相期共載匡山酒笑指丹崖翠  
壁高

訪幼輿不值

六月棠谿已挂車鶴城西望獨愁予秋深寂歷  
行周道病久艱難讀漢書樵牧尚知君子里竹  
梧空過故人居同憐藥裹風塵外落木寒烟上  
客裾

曹顧庵太史過飲海棠下奉酬

春烟寒食過掃徑問林花獵騎耳泉賦歸人傳  
望槎樽攜白社酒樹擁赤城霞莫急滄江渡中  
原已是家

送別吳星若兼柬魏惟度

上客來荒縣行館臨清池橋邊細雨發朝暮常  
絲絲舊垣青苔長新林朱果垂田家有盤餐留  
君飯紫芝不爲河朔飲繡紵空相思北行見惟  
度道頌枕江詩

登泰山

五嶽獨推泰岱尊我尋泰岱問軒轅青來幾點  
齊州小白望無邊海氣昏河伯獻魚朝日觀老  
人牽狗過天門低頭忽見雲飛處梁父西南是  
故園

黃峴嶺南下夕暉山樵散髮採山薇松盤白石  
雙龍關人傍青天一鶴飛片片雨花翻古寺濛  
濛雲氣濕春衣經年便欲畱丹壑屐齒無端送  
客歸

泊楊柳青

十里帆檣壓海雲，潮聲初下浪花分。  
人家烟火聞刁斗，岸上新添守夜軍。

春日遊水月庵

溪橋晴日好，渡水問珠林。  
曉樹浮烟出，春城帶雪陰。  
鷗鷺遊子夢，花發定僧心。  
命僕攜農具，閒聽扣角吟。

酌梁芝三吏部

角巾獨買碧山居，人羨山公啟事餘。  
詞賦近題



梁苑雪音書遠寄汴河魚幾年帝里輕回馭何  
日王門敢曳裾見說鶯啼曾有約片帆春雨到  
衡廬

九日登舊城用曹秋岳侍郎韻

唐碑突兀立東臯吊古攜樽醉紫螯寒色臨城  
秋水濶孤烟擁樹暮山高疎鐘晚飯僧初定急  
管新聲客自豪罷席同期明日酒臺邊還爲掃  
蓬蒿

謝成魯公畫山水障子

匡公隄下雪如霰軟裘快馬恣歡宴公子清狂  
迥絕倫醉騁丹青弄柔翰畫手神妙跨前人米  
顛倪迂法稍變是時江東推藍生心折公予求  
識面共信經營如有神十年湖海各獨擅相逢  
知予性好奇臨行持贈鵝溪絹歸向雪廬挂石  
壁遂令虛室生葱蒨木葉風濤終日聞山嵐彩  
翠不時現髣髴移我入此圖青苔碧石森相間  
世人胸中無丘壑徒能肖貌學韓幹焉知筆墨  
有生氣能挾風雷激紫電

長清道中

古路雙崖斷垂鞭逐馬群啼鶯當日暮歸雁過  
春分麥望隴邊兩人看山外雲往來真自放咄  
咄說雄文

晚宿長清

思歸頻遠眺一雁過高天塔斷曾經火城顏不  
記年山高風未暖海近月將圓飄泊難成寐挑  
鐙手一編

過肥城和大愚

千山通驛路百里見孤城野日經風白低雲傍  
馬行秦碑留古篆漢樹響春聲天子崇文教  
濟南起伏生

月夜同陶少鄭少兄吳少弟飲常華館  
露白天青霽色澄梧陰竹影月層層風塵萬里  
還三徑雨雪十年只一燈鸚鵡樽中開醉眼鵲  
鴿原上得良朋共傳西漢文章賤合向空山問  
大乘

病中

蘿徑何人與往還參差徒見菊花斑飛揚意氣  
窮猶壯搖落名心病始閒飢鼠張燈窺夜閣寒  
鴟掠月嘯秋山北征欲賦愁無力藥裏經旬獨  
閉關

同湘北訪程周量會元讀擬古諸詩抵暮  
相識雲霄士得披晉魏吟秋河生樹杪夕日下  
庭陰石室藏書意金門隱吏心不知歌嘯起一  
往爲誰深

良鄉雨中

萬國朝宗地蒼茫路未平秋光浮遠塔雨氣壓  
孤城爭道駝牛出盤雲鶴鶴鳴空濛望獨鹿  
樹引人行

過舊縣堡城

病踏秋烟出郭門參差路入舊東昏垂楊百樹  
齊圍寺流水一溪斜抱村何處人家藏與草獨  
聞鐘磬響高原禾侵官道無行旅自在沙鷗靜  
不喧

過東廣微先生故里

鄴東有高原落日蒼烟裏遺館濱衛河霜濤寒  
聲起庭下竄鼯鼯柿葉紛階紫列巷古衣冠云  
是先生里豐碑繁晉文伏臘走婦子先生通神  
明禱雨懷昔史今歲旱無秋得勿悲桑梓薦誠  
在澗毛手挹衛河水劍氣疑鏘鏘從人負努矣  
雲旗颺落暉容與舉芳芷懷出五色毫爲吾潤  
鄙俚

玉階怨

玉階無人行徘徊玉階側皎皎明月輝照見妾

頌  
色

卷之五十四